

Dengan keluaran ini Abu Al-Mokhtar dan lajnahnya mengucapkan Selamat Hari Raya - min al-aidin al-faidzin al-maqbulin – kepada sekalian pembaca-pembaca khasnya dan kepada ukhwanul Muslimin amnya. Kira berharap di dalam masa kita menempuh kepada Hari Raya yang akan datang mudah-mudahan ruangan ini akan berjalan terus dengan sempurnanya

menjawab, terutamanya, kepada pertanyaan-pertanyaan yang mengenai perkara hari-hari. Mana-mana pertanyaan yang belum dijawab kita berharap pembaca-pembaca bersabar sehingga sampai gilirannya. Kita mustahak mengingatkan di sini bahawa kita tidak terikat mesti menjawab semua pertanyaan-pertanyaan daripada pembaca – jawapan-jawapan yang diberi diutamakan ialah perkara-perkara yang bersabit dengan hal ehwal sehari-hari tidak diutamakan masalah-masalah yang diada-adakan sahaja yang jarang terjadi – Abu al-Mokhtar



Abdullah bin Osman Jawa Road bertanya :

Seorang sahabat saya yang baru tiba dari Indonesia setelah keluar daripada masjid Sultan setelah menyempurnakan Fardhu Jumaat telah hairan melihat orang sudah sembahyang Jumaat diadakan pula sembahyang Zohor dan di dalam masa itu banyak pula kelihatan orang-orang yang melintas di hadapan orang-orang yang sedang sembahyang itu. Dengnn kerana itu saya ingin bertanya :

1. Adakah larangan melintas orang tengah sembahyang itu?
2. Jika ada tidakkah perbuatan mengadakan sembahyang Zohor sesudah Jumaat itu menggalakkan orang membuat maksiat di masjid?

Jawab : Masjid yang terbanyaknya di Singapura ini ialah masjid-masjid yang menjalankan sembahyangnya mengikut mazhab Imam Syafie. Menurut ketetapan yang diambil oleh Imam Syafie bahawa di dalam sesebuah negeri itu hendaklah diadakan satu Jumaat sahaja tetapi pendapatannya itu dibantah oleh sahabat-sahabatnya dengan disebabkan kepayaan-kepayaan penduduk-penduduk di bandar sampai kepada satu tempat sahaja untuk mengerjakan Jumaat.

Dengan adanya pendapat itu maka sebahagian mengharuskan mengadakan Jumaat pada beberapa tempat dan mereka pun meninggalkan tujuan-tujuan supaya pada hari orang-orang Islam berkumpul untuk mendengar nasihat-nasihat atas sesuatu perkara yang terjadi pada itu yang mustahak difikir dan

dibahas oleh umum ; dan kerana itu juga maka dengan adanya banyak tempat itu dikatakan “berbilang Jumaat” di suatu tempat iaitu seperkara yang belum pernah dibuat oleh Rasul (tetapi tidak ada tegahan) dan dengan kerana itulah ada pendapat ulama yang mengharuskan itu memandang bahawa di dalam salah satu daripada masjid-masjid yang terdahulu itu sahaja yang sah Jumaatnya sedang yang lain tidak. Dengan kerana syak atas sahnya itulah lalu diadakan sembahyang Zohor lepas Jumaat (f'adah). Daripada ini zahir mereka syak akan Sahnya sembahyang mereka dan ibadah yang syak itu sudah tentu tidak boleh dipakai.

Ada pula yang berpendapat membolehkan masa sekarang mengadakan sembahyang Jumaat itu diadakan pada berbagai-bagi tempat dengan kerana khutbah-khutbah yang diadakan di dalam masjid-masjid itu tidak memberi manfaat kepada umum dan dengan kerana itu untuk menyempurnakan tujuan-tujuan yang tersebut maka mereka mengadakan Jumaat lain dengan memberi khutbah-khutbah yang sesuai bagi masa itu. Pendapat mereka ini ialah sebagai belum masjid-masjid Jamek itu digunakan mengikut kehendak-kehendak dan asas-asas diadakan Jumaat kerana khatib, di masjid-masjid Jamek itu khutbahnya masing-masing kita maklumi – jika kita boleh faham pun terjemahannya ke dalam bahasa Melayu, Melayunya menyeru masuk kubur. Mereka itu tidak mengadakan lagi

sembahyang Zohor dan mereka bersedia memberhentikan Jumaat di tempat-tempat mereka apabila tujuan-tujuan dan kehendak Jumaat itu boleh dijalankan serta memberi manfaat.

Dengan ringkas bahawa sembahyang Zohor sesudah Jumaat itu tidak pernah dilakukan oleh Rasullullah oleh sahabat dan oleh Imam yang empat – yakni diadakan megikut faham dan fikiran ulama jua.

Sekarang marilah kita perhati tentang melintas orang-orang yang sedang sembahyang. Mengikut hadis Rasullullah (SAW) maka orang-orang yang melintas di hadapan orang yang sembahyang itu sangat besar seksanya – dan jika ada yang hendak melintas hendaklah ditolak dan jika enggan dengan ditolak boleh digunakan kekerasan kepadanya. Kejadian melintas orang-orang yang tengah sembahyang itu boleh dikata berlaku di mana-mana masjid jua terutamanya kerana jahil tetapi keadaan itu lebih-lebih lagi hebatnya dengan mengadakan Zohor sesudah Jumaat kerana apabila habis sahaja Jumaat dan dalam masa qamah dan sembahyang orang-orang telah keluar masjid dan terjadilah lalu lintas di hadapan orang-orang sembahyang itu. Dengan kejadian ini patutlah kiranya ulama di Singapura ini memikirkan (1) adakah meneruskan ibadah itu dengan melanggar barang yang ditegah dengan kuat oleh Rasullullah ? Tidakkah kelak maksiat melanggar tegahan-tegahan itu pada hal mendirikan ibadah itu tidak berasas?

-----\*

“Jiwa Murni” Geylang Serai Singapura bertanya :

Saya telah terbaca dan melihat iklan seorang haji di dalam akhbar menunjukkan bagaimana mujarabnya azimat-azimat perbuatannya dengan menunjukkan bahawa beratus-ratus orang yang telah mendapat pertolongan azimat itu serta menurunkan orang-orang supaya memesan kepadanya. Adakah bahagian oleh agama memakai azimat? Jawabnya – memakai azimat itu ditegah oleh agama. Orang-orang yang percaya atau yang yakin bahawa dengan sebab azimat itu mendapat bahagian dan terlepas daripada bala dan sebagainya

itu adalah dengan terang orang itu jadi musyrik.

Rasullullah (SAW) bersabda (maksudnya): “Barangsiapa menggantung (azimat) maka sesungguhnya ia telah jadi musyrik” - hadis sahih riwayat Ahmad.

Ada beberapa hadis lagi yang menegah menggunakan azimat dan menurut pandangan kita walaupun ia Haji atau sesiapa pun apabila melakukan demikian maka ia membawa orang kepada jalan syirik.

-----\*-----\*

Yusuf Abdullah Pontian Johor bertanya: Saya selalu dinyatakan oleh orang tua-tua bahawa ditegah bercampur di antara suami dengan isterinya pada malam Hari Raya terutamanya Hari Raya Haji apakah keterangannya tegahan itu?

Jawab: Menurut pandangan ahli-ahli agama yang telah menyiasat perkara ini maka tidak ada satu pun keterangan daripada al-Quran atau al-Hadis yang menunjukkan haram bercampur dengan isteri pada malam Hari Raya bahkan tidak ada seorang pun ulama yang berkata begitu dengan ini maka tidak ada sesuatu pun tegahan yang didapati yang demikian harus daripada sangkaan-sangkaan jua.

-----\*-----\*

“Gadis Moden” Kuala Lumpur bertanya : apa hukum perempuan memakai cemara? Jawab : Cemara itu rambut ialah rambut atau sesuatu yang rupanya seperti rambut digunakan oleh perempuan-perempuan yang tidak ada rambut atau yang kurang rambut atau disambungnya dengan rambut kepalanya supaya terlihat dengan banyak rambut dan di dalam zaman moden ini pula cara itu dibuat sebagai cincin kemudian dilihat diluarnya dengan rambutnya supaya nampak sanggulnya bulat.

Dalam perkara ini ada banyak hadis-hadis yang menegah yang di antaranya bermaksud : “Allah telah melihat perempuan yang memakai cemara dan yang minta dipakaikan cemara dan perempuan

(sambungan pada muka 64)

yang mencacah dan minta dicacah. "(mencacah maksudnya ialah membuat gambar-gambar di tangan yang dicucuk dengan jarum).

Suatu hadis lagi – (maksudnya) telah berkata

Aisyah sesungguhnya seorang perempuan muda daripada golongan Ansar telah dikahwinkan dan ia sakit lalu gugur rambutnya maka mereka hendaklah memakaikan cemara lalu bertanya kepada Rasulullah (SAW) maka Rasulullah bersabda : "Allah lakan perempuan yang memakai cemara dan yang minta dipakaikan cemara."

Sebagaimana disebutkan ada banyak hadis berkenaan perkara yang tersebut ini dan sesungguhnya telah tegas dan nyata larangan tetapi ada juga ulama yang berselisih faham tentang itu di dalam beberapa jenisnya.

(1) Haram memakai cemara daripada rambut manusia sekalipun rambut perempuan atau lelaki atau rambut mahram atau suaminya, atau lainnya sebab umum larangan pada hadis itu.

(2) Haram memakai cemara daripada bulu binatang yang najis iaitu rambut bangkai, bulu binatang yang tak boleh dimakan dagingnya dan juga haram kerana membawa najis dalam sembahyang dan lainnya dengan sengaja baik yang dipakai oleh lelaki atau perempuan yang bersuami atau pun tidak,

(3) Haram perempuan yang tidak mempunyai suami memakai cemara daripada bulu binatang yang suci tidak najis.

(4) Tidak haram seorang perempuan memakai cemara daripada bulu binatang yang suci kalau ia memakai itu dengan izin suaminya.

(5) Kata Imam – Imam Malik, Thabrani dan beberapa banyak Imam lagi bahawa memakai cemara itu haram baik dengan rambut atau bulu atau perca atau pun benang.

(6) Kata Imam Ilias bahawa cemara yang haram itu ialah cemara daripada rambut. Ada pun dengan bulu, kain atau benang itu tak megapa.

(7) Kata Imam Al Mahdi bahawa tidak haram seorang perempuan bercemara dengan bulu atau bulu kambing.

(8) Ahli-ahli mazhab Hadwiyah berkata tidak haram seorang perempuan bercemara dengan rambut mahramnya.

Di dalam delapan macam yang tersebut di atas ini kalau kita perhati dengan hadis-hadis yang telah ada tidak satu keterangan pun yang mengharuskan bahkan Imam Malik, Imam Thabrani dan beberapa Imam yang lain telah mengharamkan dengan itikah bahawa bercemara itu haram sama ada dengan rambut, bulu binatang, perca ataupun benang dan dengan sebab itu dengan keterangan-keterangan hadis itu pun mengharamkan baik atas perempuan muda atau pun tua, bersuami atau tidak semuanya ditegah.

Di dalam hukum aurat mengikut Islam maka tiap-tiap seorang itu tidak mustahak bercemara kerana Islam menjadikan rambut itu aurat perempuan yang mesti ditutup yang menjadikan cemara itu tidak mustahak sebab orang-orang yang menutup kepalanya itu tidak mesti ambil tahu panjang atau pendek rambutnya tetapi yanggilan cemara ialah perempuan-perempuan yang melanggar hukum-hukum ketetapan aurat yang terang tersebut di dalam surat An-Nur iaitu tegahannya daripada Allah.

-----\*-----\*

"Gadis Sekolah" Ah Chin Street Pulau Pinang bertanya:  
Saya tertarik melihat banyak perempuan-perempuan kita mengelaskan bulu keningnya sebagai lidi – adakah dibenarkan oleh agama?

Jawab : Ibnu Mas'ud telah berkata – "saya dengar Rasullullah menegah perempuan mencabut bulu dahi dan mengasah gigi" ada beberapa hadis yang didalamnya melaknat perbuatan-perbuatan perempuan yang mencabut rambut di dahi atau yang meminta dicabut rambut di dahi mengasah gigi atau menjarangkan gigi yang mengubah perbuatan Allah. Perbuatan-perbuatan ini terang dan nyata adalah haram dan ia dilarang dan dilaknat oleh Rasullullah. Dengan sebab itu mudah-mudahan "gadis sekolah" yang bakal memasuki masyarakat itu hendaklah jangan memperbuat barang yang terang tegahan itu seperti mencabut rambut di dahi dan menghaluskan bulu kening.